



DEN NORSKE KYRKJA

Bjørgvin biskop

Prosten i Vesthordland  
Postboks 184  
5342 STRAUME

Dato: 30.11.2020

Vår ref: 19/04063-24

Dykkar ref:

## Visitasrapport frå bispevisitas i Sund 3. - 5. og 8. november 2020

Vedlagt er protokollen frå visitasen i Sund med program for visitasen og biskopen sitt visitasforedrag med utfordingane til kyrkjelydane. Vi takkar for gode dagar, og ber om at rapporten blir sendt soknepresten, soknerådet, kyrkjeverja og kommunen ved ordføraren.

Eitt år etter at visitasen er avslutta, skal det utarbeidast ein ettervisitasrapport som summerar opp tiltak og arbeid som er utført som ei følgje av visitasen. Soknepresten utarbeidar eit framlegg til slik rapport, som blir lagt fram for soknerådet til drøfting. Endelig rapport skal sendast til biskopen via prosten.

Med helsing

Halvor Nordhaug  
biskop



Tore Skjæveland  
kyrkjefagsjef

# **VISITASPROTOKOLL**

**Biskopen i Bjørgvin  
Halvor Nordhaug sin visitas i**

**SUND**

i

**Vesthordland prosti**

**3. – 5. og 8. november 2020**

Protokoll etter nytt visitasreglement:

Program  
Visitasforedrag  
(Visitasinnberetning)

## **Program for bispevisitas i Sund, 3. – 5. og 8. november 2020**

### **TYSDAG 3. NOVEMBER**

09:00 Opning av visitasen, Sund kyrkje  
09:20 Skulegudsteneste, Sund kyrkje  
11:00 Teamsamling og lunsj med staben i Sund og seksjonsleiarar, Sund kyrkje  
14:00 Biskopen samtaler med kyrkjeverje Annlaug Børve  
14:30 Biskopen samtaler med prostiprest Michal Møgster  
15:30 Biskopen samtaler med sokneprest Kjell-Asle Børnes  
Pause  
17:00 Møte med ungdomsarbeidet BOOST, kyrkjekjellaren i Sund kyrkje  
20:00 Slutt

### **ONSDAG 4. NOVEMBER**

10:00 Skulegudsteneste, Kausland kyrkje  
11:30 Besøk og andakt ved biskopen på Sundheimen, Skogsskiftet  
12:30 Møte med kommunen og lunsj, Nordsjøfartmuseet, Telavåg  
15:00 Omvising og film om Telavåg, Nordsjøfartmuseet, Telavåg  
17:00 Middag, Glesvær kafè  
18:30 Kulturkveld med påfølgande kaffi og samtale, Kausland kyrkje  
20:00 Slutt

### **TORSDAG 5. NOVEMBER**

08:30 Ordførarpraten, Radio Sotra, Straume  
09:45 Møte med prestane i prostiet, Sund kyrkje  
11:30 Lunsj, Sund kyrkje  
*13:30 Spørjetime, Sund ungdomsskule (Kl. 10 C)* Avlyst p.g.a. korona  
*14:40 Møte med lærarar (same stad)* Avlyst p.g.a. korona  
16:30 Biskopen samtaler med diakon Astrid Fylling  
17:00 Biskopen samtaler med soknerådsleiar og fellesrådsleiar  
17:30 Middag med soknerådet, staben og teamet i Sund, Sund kyrkje  
18:30 Samrådingsmøte med sokneråd/tilsette, Sund kyrkje  
21:00 Slutt

### **SØNDAG 8. NOVEMBER - Avlyst p.g.a. korona**

*11:00 Visitasgudsteneste, Sund kyrkje - Avlyst p.g.a. korona*  
*12:30 Visitasforedrag - Avlyst p.g.a. korona*  
*14:00 Slutt / SR-leiar og ordførar takkar av... - Avlyst p.g.a. korona*

## **Visitasforedrag ved bispevisitas i Sund 3. - 5. og 8. november 2020**

Kjære kyrkjelyd!

Takk for ein flott visitas og innhaldsrike dagar. Sjølv om det ikkje vart visitasgudsteneste under sjølve visitasen, har det vore fint å møta kyrkja i Sund. Det var spennande å koma til første visitas i ein heilt ny kommune og eit nytt fellesråd med ny organisering. Eg har møtt soknerådet og staben med teamleiarar til gode samtalar og drøftingar om strategi. Eg har fått møta lokalsamfunnet på kulturkveld og skulegudstenester. Eg fekk treffe ungdommen på Boost, og halde andakt på Sundheimen. Eit viktig innslag under visitasen var også møtet med kommunaleiinga på Nordsjøfartmuseet, der eg også fekk omvising etterpå.

Etter ein visitas skal biskopen summera opp sine inntrykk i eit visitasforedrag. Foredraget er blitt til i samarbeid med kyrkjeleiar Tore Skjæveland.

I dette visitasforedraget vil eg ta utgangspunkt i Sund sin flotte visjon:

Saman vil me æra Gud og byggja kyrkjelyd, gjennom å:

- Feira gudsteneste
- Gje trusopplæring
- Fremja menneskeverd og visa Kristi sinnelag i møte med barn, unge, vaksne og eldre

### **1. Saman vil me æra Gud og byggja kyrkjelyd gjennom å feira gudsteneste**

#### ***Gudsteneste***

Gudstenesta er vår hovudsamling, her møtes me for å ære den treeinige Gud, men også for å treffe kvarandre, for det er her vi hører til.

Me treng å høyra om Guds nåde og kjærleik til oss gjennom Jesus Kristus, i forkynnninga og i nattverden. Og då er det viktig med den gode

gudstenestevanen. Ein må gjera det til det normale å gå til gudsteneste, for Guds skuld og for si eiga skuld.

### ***Gudstenesteutval***

Når ein skal byggja kyrkjelyd gjennom å feira gudsteneste må ein stadig arbeida for at dei kan bli attraktive og relevante for folket i Sund. Då er det fint å ha eit gudstenesteutval som kan vera med å førebu gudstenesta saman med kantor og prest, og som også kan gjere teneste som medliturgar.

Dette bør vera eit utval som involverer fleire ved at det ikkje er ei fasttømra gruppe, men mange som er med etter tur. Det er og svært viktig at ein sørger for god aldersspreiing slik at ein viser at gudstenesta er for alle generasjonar. Det tar sjølv sagt litt tid, men det er viktig å ha tid til å involvera og hjelpa folk å veksa i trua gjennom teneste. Då bygger ein kyrkjelyd.

### ***Ungdomsgudstenester***

De har ikkje ungdomsgudsteneste, men det syns eg de skal prøva på. Når det er vanskeleg å få ungdomen med kl 11 må ein velja eit anna tidspunkt, kanskje kl 18. Eg trur at ei kveldsgudsteneste der ungdom får vera med å bestemma liturgi, musikk og innhald og deltar aktivt, kan visa ungdomen verdien i gudstenesta. Ungdomsarbeidet Boost er eit godt utgangspunkt. Kanskje er det også naturleg å involvera desse eldre ungdommane i Boost i ei konfirmantgudsteneste.

### ***Kyrkjemusikk***

Diverre fekk me ikkje oppleva kyrkjemusikken sitt bidrag i visitasgudsteneste. Eg veit de har dyktig kantor og flinke kor og eg er sikker på at det hadde løfta gudstenesta og lovsongen til Guds ære.

## **2.Saman vil me æra Gud og byggja kyrkjelyd gjennom å gje trusopplæring**

### ***Trusopplæring***

Eg vil skryta av kreative trusopplæringstiltak, de har både Kyrkjekino med bønevandring og Ranselbøn. Og de har svært stor oppslutning om Lys vaken, ja i 2017 var det heile 123% oppslutnad. Samstundes gjev de uttrykk for at trusopplæringplanen er ambisiøs i forhold til ressursane. Så no er tida inne til å evaluera og revidera planen, slik de også har sett dykk føre å gjere.

### ***Ungdomsarbeidet***

Boost er eit flott ungdomsarbeid. Det er veldig fint at de klarar å ha trusopplæring etter konfirmasjon. Her synes det som om de har funne ein god balanse på Boost. Det er både undervisning om trua og de viser at de lyttar til ungdomen sine idear, lar dei få innflytelse og tar dei med på turar, mellom anna på pølsesmaking til pølsebua «Trekroneren» i Bergen.

### ***Undervisning av vaksne***

Vaksne treng òg trusopplæring og det er behov for meir undervisande forkynning for vaksne enn det gudstenester kan gi. Folk les mindre kristen litteratur og er mindre på møter eller stemner, og det er eit behov for kunnskap om og fordjuping i trua. Difor er det fint at de har hatt både Alphakurs, temakveldar og smågrupper. Dette bør de ta opp igjen, kanskje i samarbeid med nokon av dei andre kyrkjelydane i Øygarden, eller kanskje de kan utvida undervisningskveldane i Boost så fleire kan få glede av det.

### **3.Saman vil me æra Gud og byggja kyrkjelyd gjennom å fremje menneskeverd og visa Kristi sinnelag i møte med barn, unge, vaksne og eldre**

#### ***Diakoni***

Det skjer mykje flott diakoni og her i Sund har ein hatt eit fokus inn mot born og ungdom i soknet og diakoniarbeidaren er med på kor, barnehagebesøk og trusopplæring. Det er positivt at det vert diakoni retta mot fleire generasjonar enn berre eldre. Eg vil særleg dra fram Myldredagen som skal famna folk mellom 0 og 100 og bygga bru mellom generasjonane. Det er eit godt tiltak og det er bra at ein involverer frivillige til å driva det.

#### ***Misjon***

De har òg hatt eit diakonalt misjonsprosjekt for å skaffa reint vatn i Liberia gjennom Misjonsalliansen, og no har de fått eit nytt med sosialt arbeid gjennom kyrkjelydar i Ecuador. Det er bra, slik er de med å fremja menneskeverd globalt.

#### ***Frivillige, uløna medarbeidarar***

Kristus har kalla oss til teneste og samtidig kalla oss til på utrusta dei heilage. Difor er det rett å ha Kristi sinnelag som overskrift når me samtalar om korleis ein skal følga opp dei uløna medarbeidarane. Det trengs systematisk oppfølging slik at ein har ein plan for å laga fellesskap der folk kan bli tent til teneste, kalla dei, læra dei opp, følga dei opp undervegs og legga til rette for at dei kan voksa i trua. Det er òg klokt å kalla folk for ei avgrensa tid og til ei teneste som passar deira livssituasjon anten dei er ungdom, småbarnsforeldre eller godt vaksne. Like viktig er det at me takkar dei av på ein god måte.

For å få dette til bør de vurdera å få opp ei stilling som frivilligkoordinator, ein i staben som har dette som ei særleg oppgåve. Kanskje kan ein tenka på ein deltidsstilling kombinert med t.d. trusopplæring.

Det tyder ikkje at resten av staben ikkje skal sjå dei uløna medarbeidarane, men at ein i staben skal få det særskilde ansvaret med den systematiske oppfølginga og oversikten over dei frivillige. På dette viset vil også alle dei andre i staben bli meir medvitne om kor viktig oppfølginga av dei frivillige er, og inkludere dette ansvaret også i sitt eige arbeid.

### ***Gjevarteneste***

For å få meir ressursar til å bygge kyrkjelyden, og t.d. oppretta ei ei slik stilling som frivilligkoordinator, trengs det økonomi. Som det står i visitasmeldinga: «Skal soknet få sett ut i livet meir..., må det reisast meir midlar». Dette vil eg heia på og dette må de gjera noko med i praksis, for dette dreier seg om at Kristi sinnelag skal nå ikkje berre hjartet, men heilt inn i lommeboka.

No er Sund sokneråd ganske flinke til å samla inn pengar på julemesse i Sund og vårmarknad i Kausland. Ja, de har til og med ei gjevarteneste der det kjem inn ein del, men den bør utvidast.

Eg trur det er lurt å organisera det slik at folk kan gje direkte til det arbeidet dei ser, anten det er trusopplæring, arbeid for barn og unge, diakoni eller kyrkjemusikk. Då kan ein utfordra nye, sjølv dei som ikkje enno er kyrkjegjengarar, til å bli med på ein dugnad for eit godt arbeid. Til dømes kan foreldre til born som har glede av trusopplæringa utfordrast til å gi. Og det er viktig at gjevarglede og forvaltaransvar vert løfta fram i forkynninga.

### ***Takk til kommunen***

Eg vil takka kommunen for ein god dialog og eit godt møte med ordførar og varaordførar og for stor velvilje også når økonomien er stram. Det er flott at ein ser kyrke sitt bidrag til å bygga eit godt lokalsamfunn og at ein utfordrar kyrkja på kva ein kan bidra med vidare i ein ny kommune.

## **Takk**

Til slutt vil eg seia takk for ein god visitas med mange gode opplevingar. Eg vil takka og alle som har vore med å skrive visitasmeldinga, som inneheld mykje god informasjon. Takk til presten, soknerådsleiar, kyrkjeverja staben og teamet for god tilrettelegging. Takk også til prost Jan Tommy Fosse som har vore med å planlegga visitasen, sjølv om han ikkje kunne vera med visitasdagane, og som er biskopens utstreckte arm til sokna i Øygarden når biskopen ikkje er her.


Og så nokre utfordringar til dykk, som oppsummerar denne visitasen. Om eit år vil eg ha ein rapport om korleis de har arbeidd med dette:

- Gå til gudsteneste regelmessig, både for dykkar eiga skuld og for å gje Guds ære.
- Hald fram i arbeidet for gode gudstenester ved å oppretta eit gudstenesteutval, og inviter ungdomen til ungdomsgudstenester.
- Ta opp tradisjonen med undervisningskveldar for vaksne
- Arbeid med systematisk oppfølging av frivillige uløna medarbeidarar og vurder om de kan få til ein frivilligkoordinator
- Det trengs ei utvida gjevarteneste, og givergleden må forkynnes fram og mennesker utfordres til å bidra.

Og med desse utfordringane takkar eg for desse dagane!

Eg ynskjer Guds signing over folket og kyrkja i Sund.

Bjørgvin bispestol, 8. november 2020

  
Halvor Nordhaug

